

**ERINDISBRÉF**  
**FYRIR**  
**LANDBÚNAÐAR- OG ATVINNUMÁLANEFND**  
**EYJAFJARÐARSVEITAR**

**I. kafli.**  
**Skipan nefndarinnar og hlutverk.**

**1. gr.**

Landbúnaðar- og atvinnumálanefnd er skipuð af sveitarstjórn til fjögurra ára að afloknum bæjar- og sveitarstjórnarkosningum. Nefndin er tengiliður sveitarstjórnar við atvinnulíf í sveitarfélaginu og fjallar í umboði sveitarstjórnar um atvinnumál eftir því sem hún lætur þau til sín taka. Jafnframt fjallar nefndin um málefni landbúnaðarins, önnur en fjallskilamál, sem lögum samkvæmt eru á könnu sveitarstjórnar.

**2. gr.**

Landbúnaðar- og atvinnumálanefnd er skipuð fimm fulltrúum og jafn mörgum til vara. Auk kjörinna fulltrúa hefur sveitarstjóri rétt til að sitja fundi nefndarinnar með málfrelsi og tillögurétti. Oddviti sveitarstjórnar boðar nefndina saman til fyrsta fundar eða ákveður hver skuli gera það nema formaður hafi áður verið valinn af sveitarstjórn. Á þeim fundi skal kjósa formann, varaformann og ritara nema lög eða sveitarstjórn ákveði annað. Ef formaður fellur frá eða forfallast á annan hátt varanlega getur sveitarstjórn ákveðið hvort varaformaður tekur við formennsku í nefndinni eða velur annan í það hlutverk.

**3. gr.**

Helstu verkefni landbúnaðar- og atvinnumálanefndar eru eftirfarandi:

- a. Að vera sveitarstjórn til ráðuneytis í atvinnumálum að því marki sem hún lætur sig þau varða.
- b. Að fylgjast með þróun atvinnamála í sveitarfélaginu og hafa vakandi auga með möguleikum til fjölbreyttara atvinnulífs og atvinnutækifæra innan sveitarfélagsins.
- c. Að gefa sérstakan gaum að möguleikum og þróun í ferðaþjónustustarfsemi.
- d. Að fylgjast sérstaklega með málefnum landbúnaðarins í þeim tilgangi að stuðla að blómlegum landbúnaði innan sveitarinnar og sjá um að lögum og reglugerðum, sem um hann gilda sé framfylgt, eftir því sem við á og er í verkahring sveitarstjórnar að ábyrgjast.
- e. Að eiga samstarf við ráðgjafarþjónustu landbúnaðarins þegar við á.
- f. Að fjalla um eyðingu refa og minka.
- g. Að gera tillögu til sveitarstjórnar um reglur um hunda- og kattahald og fylgjast með að þeim sé framfylgt.
- h. Að eiga samstarf við Atvinnuþróunarfélag Eyjafjarðar og aðra stuðningsaðila atvinnulífsins þegar við á.
- i. Að annast önnur þau verkefni á sviði landbúnaðar- og atvinnamála, sem sveitarstjórn kann að fela henni.

#### **4. gr.**

Landbúnaðar- og atvinnumálanefnd skal gera tillögur að verklagsreglum um framkvæmd og meðferð þeirra mála, sem snúa að eftirlitsskyldu og úrræðum vegna samþykktar um búfjárhald í Eyjafjarðarsveit nr. 581/2013 öðrum en þeim sem snúa að fjallskilum. Verklagsreglur og samþykktir nefndarinnar öðlast ekki gildi fyrr en sveitarstjórn hefur staðfest þær.

### **II. kafli**

#### **Fundir nefndarinnar og starfshættir.**

#### **5. gr.**

Fundir í landbúnaðar- og atvinnumálanefnd skulu haldnir þegar efni liggur fyrir til umfjöllunar en þó ekki sjaldnar en 4 sinnum á ári. Skylt er að boða fund ef meirihluti nefndarmanna æskir þess.

#### **6. gr.**

Formaður boðar fund og stýrir honum. Formaður skal ávallt hafa samráð við sveitarstjóra um boðun fundar og kynna honum efni hans. Fundur telst löglega boðaður ef til hans er boðað með minnst tveggja sólahringa fyrirvara. Fundir nefndarinnar skulu að öllu jöfnu boðaðir með skriflegri dagskrá og skal dagskránni fylgja afrit erinda eða annarra skriflegra gagna, sem tengjast dagskrárliðum fundarins. Fundir skulu haldnir fyrir luktum dyrum. Fundur telst ályktunarhæfur ef meirihluti nefndarmanna er mættur og ræður afl atkvæða afgreiðslu mála. Falli atkvæði að jöfnu telst mál fallið.

#### **7. gr.**

Fundir landbúnaðar- og atvinnumálanefndar skulu tölvuskráðir auk skráningar í sérstaka fundargerðarbók. Við skráningu skal fylgja þeim meginreglum, sem gilda um skráningu fundargerða sveitarstjórnar sbr. 15. gr. samþykktar nr. 861/2013 um stjórn Eyjafjarðarsveitar. Fundargerðarbók og öll bréf, erindi, skýrslur og skjöl, sem snerta starf nefndarinnar, skulu varðveitt á skrifstofu Eyjafjarðarsveitar. Afgreiðslu mála, sem leynt eiga að fara skv. lögum eða eðli þeirra, skal skrá í sérstaka trúnaðarmálabók sem skal varðveitt á skrifstofu Eyjafjarðarsveitar. Fulltrúar í sveitarstjórn ásamt sveitarstjóra hafa óheftan aðgang að öllum gögnum nefndarinnar nema lög ákveði annað.

#### **8. gr.**

Fulltrúar í landbúnaðar- og atvinnumálanefnd skulu í störfum sínum fara eftir þeim siðareglum sem sveitarstjórn setur. Þar er m.a. kveðið á um þagnarskyldu sem helst áfram þótt nefndarmenn hætti störfum.

#### **9. gr.**

Landbúnaðar- og atvinnumálanefnd skal leitast við að haga störfum sínum á hverjum tíma í samræmi við stefnu sveitarstjórnar í málaflokknum og þann fjárhagsramma, sem honum er settur. Þá skal hún leitast við að haga störfum sínum þannig að ákvarðanir

hennar nýtist í þágu sem flestra íbúa sveitarfélagsins en nefndarmenn eru þó ekki bundnir af öðru en sannfæringu sinni, lögum, reglugerðum og samþykkt um stjórn Eyjafjarðarsveitar í atkvæðagreiðslu á fundum nefndarinnar.

### **III. kafli.** **Eftirfylgni.**

#### **10. gr.**

Til að fylgja eftir staðfestum ályktunum eða samþykktum nefndarinnar skal formaður snúa sér til búfjárefntirlitsmanns með málefni, sem snerta starfssvið hans, en annars til sveitarstjóra. Sinni búfjárefntirlitsmaður ekki fyrir mælum nefndarinnar snýr formaður sér til sveitarstjóra. Þurfi frekari eftirfylgni í málum, sem búfjárefntirlitsmaður eða sveitarstjóri fá til afgreiðslu frá nefndinni, snýr formaður sér til sveitarstjórnar.

### **IV. kafli.** **Réttindi og skyldur nefndarfulltrúa.**

#### **11. gr.**

Um réttindi og skyldur nefndarmanna gilda eftir því sem við á ákvæði V. kafla sveitarstjórnarlaga nr. 138/2011, sbr. einnig V. kafla samþykktar um stjórn Eyjafjarðarsveitar. Nefndarmönnum er skylt að kynna sér þessi ákvæði. Samþykktina má finna á heimasíðu Eyjafjarðarsveitar og lög á vef Alþingis.

#### **12. gr.**

Fulltrúar í landbúnaðar- og atvinnumálanefnd skulu kynna sér þau lög og þær reglugerðir sem gilda um þá málaflokka sem undir nefndina heyra og samþykktir og reglur sem sveitarstjórn hefur sett. Það á einnig við um samninga og/eða samstarf á þessum vettvangi við önnur sveitarfélög. Í þessu samhengi er m.a. bent á eftirfarandi:

- Búnaðarlög, nr. 70/1998.
- Lög um búfjárhald, nr. 38/2013.
- Girðingarlög, nr. 135/2001.
- Reglugerð um búfjárefntirlit o. fl., nr. 743/2002
- Reglugerð um vörslu búfjár nr. 59/2000.
- Reglugerð um merkingar búfjár, nr. 916/2012.
- Reglugerð um girðingar, nr. 748/2002.
- Reglugerð um girðingar meðfram vegum, nr. 930/2012.
- Samþykkt um búfjárhald í Eyjafjarðarsveit nr. 581/2013.

Þá er nefndum sveitarfélagsins skylt og rétt að eiga með sér samstarf um verkefni, sem kunna að skarast með einhverjum hætti eða málefni gefur að öðru leyti tilefni til.

**V. kafli.**  
**Gildistaka.**

**13. gr.**

Erindisbréf þetta, sem byggir á ákvæðum sveitarstjórnarlaga nr. 138/2011, stjórnisýslulögum nr. 37/1993 og samþykkt um stjórn Eyjafjarðarsveitar, var afgreitt í sveitarstjórn Eyjafjarðarsveitar þann 12. apríl 2017 til að taka þegar gildi. Jafnframt er úr gildi fallið erindisbréf fyrir atvinnumálanefnd Eyjafjarðarsveitar frá 23. júní 2003.

Eyjafjarðarsveit 12. apríl 2017.  
Sveitarstjórinn í Eyjafjarðarsveit